

'Najib pemimpin berwawasan'

Utusan Online

09 April, 2013

Oleh Zulhisham Isahak

MUAR 8 April - Rekod cemerlang Datuk Seri Najib Tun Razak sebagai Perdana Menteri sepanjang empat tahun lalu perlu dijadikan rujukan dan panduan dalam memilih kerajaan pada Pilihan Raya Umum Ke-13.

Menteri Besar, Datuk Abdul Ghani Othman berkata, Najib merupakan pemimpin demokrat yang mempunyai wawasan baharu untuk membawa Malaysia ke persada lebih gemilang dan buktinya boleh dinilai melalui manifesto Barisan Nasional (BN) yang dilancarkan kelmarin.

"Terbukti beliau dapat meneruskan yang terbaik untuk kita termasuk suasana keamanan, kemajuan, pertumbuhan ekonomi dan meningkatkan tahap kesejahteraan rakyat," katanya dalam Program Bicara Perdana Bersama Tun Dr. Mahathir Mohamad di hadapan lebih 10,000 pengunjung di Dataran Tanjung Emas di sini malam tadi.

Yang turut hadir isteri Dr. Mahathir, Tun Dr. Siti Hasmah Mohd. Ali dan Timbalan Menteri Belia dan Sukan, Datuk Razali Ibrahim.

Abdul Ghani berkata, menerusi manifesto BN, negara akan berada pada asas yang lebih kukuh bagi tempoh lima tahun akan datang dan Najib akan terus memacu pembangunan dan meneruskan kesinambungan kepemimpinan BN.

Sehubungan itu beliau menyeru rakyat terutama di Johor terus memilih calon BN dan mengingatkan mereka agar tidak sekali-kali mempertaruhkan masa depan negara dengan mengundi pakatan pembangkang.

"Jangan sekali-kali memperjudikan masa depan kita dengan parti pembangkang yang hanya menabur janji dan berfantasi, masa depan kita akan menjadi tidak tentu hala dan juga tiada pembelaan untuk rakyat jika pilih pembangkang.

"Pilihlah kerajaan yang boleh diberi kepercayaan dan sudah terbukti cemerlang dalam memimpin negara sejak merdeka lagi," katanya

Hakcipta Terpelihara © UTUSAN MELAYU (M) BERHAD

Source : http://www.utusan.com.my/utusan/Pilihan_Raya/20130409/px_24/Najib-pemimpin-berwawasan